

事必過于厚，情文始稱。願明詔禮官舉行，以稱陛下祇事神靈之意。」

劾李健汪召嗣奏 紹興六年十月

二人議罪施行，當坐軍法。今日正大明賞罰、以警中外之時，不容輕貸。《建炎以來繫年要錄》卷一〇六。

嚴州圖經序 紹興九年正月

《周官》職方氏掌天下之圖，周知其數要。漢得秦圖書，具知天下阨塞、戶口多少強弱處；光武中興，按《司空輿地圖》以封諸子。歷代放周，遂以職方名官。至唐立制，凡地圖命郡府三年一造，與版籍偕上省。國朝定令，閏年諸州上地圖。大中祥符四年，詔儒臣纂修《圖經》，頒下州縣，俾遵承之，距今百二十有八年矣。其間州名有更易，軍制有升降，戶口有登耗，賦稅有增損，既皆不同。而又艱難以來，州縣唯科歛是急，趣具目前，閏年之制寢以不舉，蓋職方之職廢也。紹興七年，菜來承乏，嘗訪求歷代沿革、國朝典章、前賢遺範，率汗漫莫可取正。詢之故老，則曰是邦當宣和庚子盜據之後，圖籍散亡，視他州尤難稽考。乃喟然歎曰：惟嚴爲州，山水清絕，高賢之遐躅，久以輯睦得

名，今因嚴陵紀號。自唐爲軍事州，藝祖開基，首命太宗爲睦州防禦使。先帝政和中，悉褒錄祖宗潛藩之地，詔升其軍爲節度，既而出節少府，以授今上，嘗以親王遙臨鎮焉。其後繼世，以有天下，實似太宗。蓋是邦而爲真主興王之地，其視少康之綸、漢文之代，有不足道，則地望顧不重哉！而況歷代以來，文人才士間出於其地，偉賢鉅公來爲牧守者相望也，庸可以勿紀乎？於是因通判軍州事孫傅有請，乃屬僚屬知建德縣事熊邁、州學教授朱良弼、主建德縣簿汪勃、主桐廬縣簿賈廷佐，及郡人前漢陽軍教授喻彥先相與檢訂事實，各以類從，因舊經而補緝，廣新聞而附見，凡是邦之遺事略具矣。豈特備異日職方舉閏年之制，抑使爲政者究知風俗利病，師範先賢懿績；而承學晚生覽之，可以輯睦而還舊俗；宦達名流望之，可以全高風而勵名節，詎小補也哉！至於紀錄尚或未盡，則以俟後之君子。紹興己未春正月壬午，知軍州事董棻序。《嚴州圖經》卷首，漸西村舍彙刊本。又見《皕宋樓藏書志》卷二九。

嚴陵集序 紹興九年四月

《詩》三百篇，大抵多本其土風而有作，聖人刪取，各繫其國。如二《南》皆正風也，周、召既分陝而治，則繫《詩》有不得而同。三國當變風之始，鄆、郿既并於衛。郿居衛北，而《詩》有《北門》，以興出門而北歸於鄉也；郿居衛東，而《詩》有《載馳》，以興東徙渡河而廬於漕也；衛在河之